

欽  
定  
全  
唐  
文

欽定全唐文卷四百九十一目錄

新文藝出版社藏書

權德輿九

送歙州陸使君員外赴任序

送崔端公赴江陵度支院序

送張僕射朝覲畢歸徐州序

送韋起居老舅假滿歸嵩陽舊居序

奉送崔二十三丈諭德承恩致仕東歸舊山序

送徐諮議假滿東歸序

送前溧陽路丞東歸便赴滑州謁李尚書序

送袁中丞持節冊回鶻序

送張閣老中丞持節冊弔新羅序

奉送韋中丞使新羅序

送主客仲員外充黔中選補使序

送司門殷員外出守均州序

送袁尚書相公赴襄陽序

奉送韋十二丈長官赴任王屋序

送崔十七叔曹判官赴義武軍序

送劉秀才登科後侍從赴東京觀省序

送杜少尹閣老赴東都序

送許校書赴江西使府序

月夜泛舟重送許校書聯句序

送張校書歸湖南序

送陸校書赴祕省序

送薛十九丈授將作主簿分司東都序

欽定全唐文卷四百九十一

權德輿

九

送歙州陸使君員外赴任序

始予與公佐俱以圓冠褰衣息偃於江湖閒練塘鏡溪樂在雲水師心自放相視莫逆其後則攻過內訟知道不遠人洗其心虛以順外逮三四年又俱以法冠翹車爲諸侯賓攝衣塵中與俗駕並馳閒關道路離憂多而歡言少七年詔書以禮官博士徵鄙夫於吳十六年以尚書祠部徵公佐於越其閒閒闊忽焉十歲心期寓書常若對面中朝

大夫君子皆以推轂爲已任未至如軼然亦旣覲止笑與  
抃會月未再期麾幢在門繇是大夫之賢者士之仁者皆  
惜其去以公佐有端藻直質無巧言譎笑得之自是不得  
自是故也今天子加恩元元慎重吏師則列郡長人不輕  
於中都官明矣况宣城有賢長帥以廉風俗新安有佳山  
水以資勝踐爲仁由已賦祿且厚此皆不期至而至者然  
則表課陟明疾若傳置行當以尺一徵書奪於是邦邦人  
雖欲遮道借留末由也已又惡用今日少別爲戚戚耶公  
佐嗇神自愛以俟良會

送崔端公赴江陵度支院序

今年春上始命二小司徒主量入經費之節辨繇賦權筦之法皆內有郎吏外有從事多冠惠文冠分道將命督課郡國其或才軼羣倫望重搢紳者則總二府之職而兼領之故執事有今茲南荆之命用能選也初執事以名聲文采爲士林所仰方退然深居於華陽僊府講道肄業恬曠自居諸公之辟日至山下且以道勝於內則出處不殊儒衣昂然徐就知己及參總世務更居劇職動成故事去如始至論文變則能窮損益之旨商功利則能通輕重之權

故數年之閒三踐憲司赤紱在股襜如褱博諸生榮之歲  
十二月自鍾陵抵江陵驅車卽路不憚冰雪况騷楚遺韻  
楓江遠目在此路也情如之何五言詩送別之始故自戴  
臨川蕭王二柱史已降皆徵文貺遠字用五而詞多楚者  
以地理所厯且行古之道也

送張僕射朝覲畢歸徐州序

大君子所以貴者道合於上化流於下得時大行求福不  
回而已僕射南陽公鎮徐方十年師貞人和拜章請覲冬  
十月四牡凋戈至於京師或誦其德輝或歌其事功直道



相賀懦夫立志公始以褒衣儒冠游公卿間仁義博富名  
聲籍甚其後擁傳佐戎專城靖人福以至德惠之美利臨  
駭機以激大順奮州師以摧劇虜淮湖之間嶷然保障陟  
明加地再命元侯康衢自隨於趾步枉道不萌乎心術而  
文鋒師律奇正相合以氣爲主與古爲徒故其緣情放言  
多以莫耶自況然則天下之肯綮適所以資公之斷割耶  
上之注意也深公之誠慮也至貢端誠以無隱沃宸慮如  
合符盡直於內詭詞於外日降慶賜載淹旆旌元正前殿  
之賀中和內朝之直鏘鏘鸞聲湛湛露斯雖韓侯入覲吉

甫燕喜無以過也迨茲春半受命言旋中朝賢士大夫皆舉酒爲壽徵詩爲禮蓋悅公之風而惜別也德輿辱當授簡詞不逮意姑以掖垣所賦類於左方云

送韋起居老舅假滿歸嵩陽舊居序

九年正月左史韋公移疾旣踰時左曹以聞得請當免遂以角巾野服如東周舊山中朝廷搢紳先生之徒車轂擊於通衢觴酒交於竹林執其衣袪惜乎分陰弦晦屢移其歡不厭或發於歌詠以將厚意外孫權德輿序而言曰大凡士之生世有二道焉其出也宣其功緒播其利澤納忠

服勞以服天下其處也味道之腴與古爲徒休影息跡以閒身世不如是者細則牽於利欲大則囿於得喪識真者羞之公之先扶陽始以丞相致仕爲西漢盛典逍遙以安車不屈爲北朝外臣至是左史又能伸其志以宏其世嘉遜德風盛乎一門况吾君用太和理萬物動者靜者各遂其方則陳力以致用潔身以宏教其利一也故左史得以聰明爲駢枝以名聲爲纏繳無耗氣無焚和退然葆真獨與道往鷗鳥不動家人忘貧是行也朶頤者知懼矣出車家林揮手青門擁途而祖者唯恐不及合歡也忘印紱之

輕重陳詩也無章句之約束放言無擇造適則笑行觴無  
算既醉而罷虧成彼是曾不得棲於念慮之中而惠風閒  
雲飄拂左右動用視聽無非大方推是類而廣之則泛清  
伊陟嵩邱又可知也小生無以爲贈謹序其所以然附於  
編

奉送崔二十三丈諭德承恩致仕東歸舊山序

大易之言君子也有出處語默之異或有猷有爲以宣事  
功或不營不忒以順天理則陳力廟廊之上潔身巖石之  
下皆其所也至於振風聲以助時化無乃處者裕乎丈人

燕居積四十年而天爵人爵合發至京師周月而解巾致  
政之詔再下豈徒然哉初躬耕於延州三茅山之趾安仁  
食力聲利不入心虛曠而體胖道義富而家肥閨門淑行  
流於鄉黨泊然與白雲鷗鳥同其無事去年春鶴書下江  
南江南守臣多方以起之至止之日褐衣召見未受命而  
被以章綬既受命而侍於宮朝循性蹈道不遷於物抗章  
乞身詞直而明凡五上而後得請之詔下寵秩優禮周行  
聳視上以爲天下之本至重必資賢人以奉三善故命職  
命官皆在於是及不得已而賜告也猶以審諭道德處之

不然者豈無他豐祿耶蓋尊元良以貞萬國聖人之心也  
噫夫士能自審出處之宜而不惑者鮮矣或圖於利欲四  
顧滿志或沒於黨類不能自還嚮非強志峻節皦然清厲  
大圭不琢獨鶴無侶難乎哉追思曩歲一踐巖逕蓋二十  
年矣徐話舊故有悲有歡唯冥冥翰飛不可及已輕裘喜  
束心與道勝軟輪徐驅故山有輝想夫草堂環合喬松千  
餘本交柯翳景吟泣風露幅巾長謠偃放其閒一氣不耗  
四支交暢清時外臣其樂如何非仁聖不能全不奪之操  
非堅明不能果獨往之志惇史古風復行於今羣公惜別

飛蓋擁道如漢廷祖二疏故事而類之以歌詩德輿泝其  
心源也熟故斯言不忤

送徐諮議假滿東歸序

徐生用經術厯太學太常二博士諮議於王門徊翔於天  
朝褰衣赤紱官品第五移疾請告歸息於讓王之舊鄉其  
進也量力其退也修性斯可嘉矣國朝禮文酌損三代最  
爲詳正生所洽通而又采獲古今亡於禮之禮者考論稽  
合頗有條貫故顧居守夷仲徐左曹元封今歸侯公和皆  
深知之生喟然曰州閭達者凋落大半吾過縣車數歲已

爲壽班在下大夫不云賤況天爵貴於纓冕田廬樂於都  
邑思雲卧水宿食稻與漁則華棖列鼎不如是之適賈勇  
於退不能留行可以言賀胡爲愴別鄙夫嘗游息三吳閒  
殆二十年每耳聞水國如話鄉黨則徐生亦吾之僑舊也  
可忘情耶商皓遠矣以不才者處之退朝隱几幸類休沐  
江海之思油然而生適因送歸愛此行色時歲荏苒去異  
糗無幾何多疾早衰筋骸日耗乞身自便雖未敢言涉江  
而南聊寄夢想秋九月太子賓客權德輿序

送前溧陽路丞東歸便赴滑州謁李尚書序



昔路溫舒舉孝廉補石邑丞以二千石竟用文學推重漢  
廷今路君亦果於修身敏於試吏經術以端其行歌詩以  
導其辭罷溧陽丞累年矣廉故居約謙故後時塵縉逢掖  
不枉其道今自京師抵東吳且曰滑州尚書公之鎮南服  
也嘗假從事公實知之今將謁轅門以修賀詞整羸車以  
便歸路申舊展禮無所恩累焉然而三揖善價之來雖欲  
逃之難矣膳部郎楊君之出也亟稱舅氏之賢徵詞於我  
敢附仁者之贈以宣不腆之言且嚮之溧陽猶古之石邑  
重之以賢侯盛府以發其道異時漢廷之慶又何疑焉閭

然日彰在此舉矣左補闕權德輿序

送袁中丞持節冊回鵑序

國家用文教明德懷徠外區今年春回鵑君長納忠內附  
譯吉語於象胥復古地於職方方帥條其功實聞於天子  
乃擇才臣以宣皇仁於是詔工部郎袁君加中憲之重被  
命服之貴將行又拜祠部郎中有司具儀法持節冊命所  
以新其號而厚其禮也中丞端淳而清文敏而誠才以周  
物智以達變識柔遠之五利能專對於四方攝衣登車不  
問夷險朝賢搢紳是以壯其志而嘉其忠且滇池昆明爲

西南雄部嘗樂聲教是焉纂修奇功自效願爲保障方今規模宏大八表一家然則俛首以帥化者吾君受之而不阻勤人於遠畧者吾君薄之而不務彼唐蒙開地爲好事之臣諸葛渡瀘蓋一方之利況今文武吉甫鎮安蜀都而中丞將大君之禮命固殊鄰之職約德行言語實在是行使邊人緩帶安枕無煙火之警酌古經遠才者能之金章瑞節光耀原隰近臣主文乃類歌詩鄙人不腆忝記言之職故西南之冊命使臣之優詔皆得書之授於史官又嘗與中丞同爲江西從事辱命內引所不敢辭

送張閣老中丞持節冊弔新羅序

祕書少監張君旣受詔以執法持節錫命於北方弔其告  
終嘉其稱嗣致賜諭旨以宏天覆長幼養老以遂人和旁  
達休嘉上應古始聖人之道也況中丞用文學政事敏知  
達才彌綸諷議官業以序而又修史氏之職且逾一紀國  
家有殷薦嚴配之典必相其儀有受詞專對之重必將有  
命蒞事不惑居常讓夷是行也知其習俗中其宜適粲然  
而接之以文驩然而加之以恩迴車伏奏可以光大南宮  
眾君子固以類其歌詩陰方之氣俗四牡之踐履考功郎

苗君序之詳矣披垣寮舊又申以七言鄙夫承君之歡辭則不腆亦既辱命俾次羣篇是用直書納諸橐中而已

奉送韋中丞使新羅序

昔鄒魯之諺以贏金不如者蓋一經耳今中丞文博究其五皆可名家則扶陽重侯之儒術爲踐修矣自外臺從事不四三年歷左史尚書郎其取青紫易於地芥前此以盟津貞師則授以司武今茲以雞林纂代則俾之錫命藉奏議以中輟擇專對而遂行行止之間有以見文敏歸重也太平尚仁多識古訓訃終請嗣禮之重者宜乎以儒冠智

囊弔祠臨存佩二印捧三冊使有截之外家肥德洽將渥  
綈之命視勤遠如夷其忠信歟三臺雋彥歌詩讌輶至若  
辰韓息慎之俗懷方象胥之道賓將洽驩之盛致賜諭旨  
之榮自原隰之華至溟漲之大雲氣海物昕昏變化眾君  
子言之詳矣中丞以佐曹陳君之厯司封郎也今爲之代  
以德興之忝駕部郎也又爲之代凡兩掖所賦盍偕序以  
爲好宜徵作者猥及鄙人直書粗畧敢謝不敏

送主客仲員外充黔中選補使序

選部每歲以四才三實銓署羣吏每三歲則有詔以諸曹

郎分命南轅調其任次有黔江辰溪十五郡五十餘城賦  
其吏員便其習俗主客郎仲君實司之君始以岷峨諸生  
獻賦京師因文章典義濬發聲實自解巾校文三四遷至  
博士尚書郎邃於禮籍推本今古乖疑缺微者皆折中焉  
敏於奏議練程達品肯綮窾郤者每游刃焉則南方之職  
業必序縣道必理固其殼中之細者况孔門之果於從政  
大雅之古訓是式皆子之家法也又何所規昔司馬長卿  
以駟馬車歸故里有郊勞負弩之榮今君道劒門抵左綿  
銅梁玉壘喬木可辨畫錦星輶其樂何如又想夫歸自涪

陵出於南荆沿巴峽之風水冒陽臺之雲雨昏旦萬狀發  
於歌詩凡今漉酒祭輶者不可以不賦

送司門殷員外出守均州序

春二月武當耄老相率詣丞相府請以司門郎殷君爲郡  
相府嘉之以其詞數聞先是君嘗佐廉問於漢南會是邦  
缺守乘傳權領實有美利浹於人心懷思詠歎久而彌結  
上方酌漢宣故事綜覈名實有分符竹以主郡國者初必  
召問以觀其言退而考察以質其效從人之欲卽日詔下  
中朝相賀以爲有古道焉且君富於文誼恬於利欲比興



聲律播於士林故二十年閒官薄不遷令問滋大去歲甫  
爲尚書郎今茲持郡節動靜之道較然不迴噉夫父母一  
邦化條在已以此爲政不亦重乎阜安之而平其吏由訓  
理之而示其典法用少卿之政徐考便宜行次公之道不  
從靡密由前日之理術首凡今之績課彼東觀論著之臣  
方操簡冊以待循吏得不務乎君子於是舉也上美朝廷  
之命順於人下嘉武當之叟達於天則殷君之道從而可  
徵矣王城東南千里而近新紱在股兩轡有輝郡齋佳句  
佇與報政偕至吾徒賀徵拜之不暇又何愴焉盍用歌詩

爲禮以附其至

送袁尚書相公赴襄陽序

皇帝惠慈元元夙寤晨興東求官師寄重方國癸未詔書以地官淮陽公撫封於漢南公以全才碩望爲上所器任故命相之初公登右輔維藩之選公在東郡徵還不累月而推轂於茲中外宣力安危注意其以導迎休和輝耀光明愷悌四鬯英華外發心誠求之無不及焉洪範之有猷有守中庸之不疚不貽申伯之柔惠且直次公之外寬內明皆優爲之贊畫辰告節印照路漢廷公卿留歡不足少

傳榮陽公首爲詩文二百言以餞榮陽公貴仕三朝算秉  
國成辭巨源之啟事就子房之優佚迅發麗則如黃鐘白  
珩襄峴之風物會離之情狀盡在是矣方今堯舜在上理  
臻平明罷宰政之臣或寄崇元侯或服在大僚然後見南  
國滔滔之盛大廷濟濟之美鄙人以鴻私寬宥猶汙文昌  
官方謂與公入奉朝請歸聯衡輓今則命賜倍厚豈敢復  
以少別爲愴耶六曹官諸曹兩掖近臣侍繼榮陽之唱者  
凡若干篇列於左方春三月禮部尚書扶風郡公權德輿  
載之序

奉送韋十二丈長官赴任王屋序

丈人承炎漢扶陽重侯之後代爲多才郎襄德勳戴翼周  
運其族滋大猶景山鄧林峻極扶疎昌阜蕃祉其理然也  
以仁義之根柢發文學之英華居夷處厚恬然自是凡五  
筮仕三以選部掄材升詳廷尉薦其進不苟始調爲黃綬  
尉其後再歷郡都吏縣大夫皆有理效著於官下出入三  
十年閒清議以法冠郡節處之而竟未至嚮者枉尺由徑  
與角逐者均其六轡則纍纍若若之佩不足取也而消息  
木雁精辯龜頤乃命復腰銅章實長王屋且以天壇日觀

境非人間灑襟靈而清眎聽揮慶霄以挹沆瀣然後用愷  
悌清靜之道惠於一同有吏有隱真君子之心也昔卓子  
康魯仲康之倫爲密與中牟至司徒太傅皆教化之所自  
也仁遠乎哉猥以庸薄累叨榮級宴輒佐酒恭聞話言徵  
孩提而見愛語中外以多感拜手授簡情如之何朝賢士  
友類詩以貺懿茲踐履之可書且俟其光大也

送崔十七叔胄曹判官赴義武軍序

司徒延德王握兵符相印專征於博陵上谷之地理下建  
都府以雄山東行師必直壯辟士必誠重州壤之內慙信

金匱要略卷之二十一  
是求士君子之宦遊寓去其本久矣亭伯子玉之裔幕庭  
賓榻之選行車撰日姻族榮之以執事之端敏肅給且故  
相國安平穆公之從父弟也腴潤於友愛琢磨於仁義謙  
以自牧實而不華閨門公府皆奉金鉉人倫之美無乃裕  
乎居則贊長轂名在諸侯之策行則侍介圭來近天子之  
光人生少別斯乃細故不當效兒女子戚戚在勉強志業  
而已至於道觀離宴歌詩感激則備於右拾遺獨孤郁前  
敘云

送劉秀才登科後侍從赴東京觀省序

每歲儀曹獻賢能之書於王然後列於祿仕宣其績用耳  
小司徒以楚金餘刃受詔兼領彭城劉禹錫實首是科始  
予見其艸已習詩書佩觿韞恭敬詳雅異乎其倫及今見  
夫君子之文所以觀化成立憲度末學者爲之則角逐舛  
馳多方而前子獨居易以遜業立誠以待問秉是謙慤退  
然若虛況侍御兄以文章行實著休問於仁義義方善慶  
君子多之春服旣成五綵其色去奉嚴訓歸承慈歡與侍  
御游久者賀而祝之曰太邱之德萬石之訓亦將奉膳羞  
於公府敬杖履於上庠公卿無慚龜組交映不待異日而

前知矣鄙夫既識其幼乃序夫羣言耳

送杜少尹閣老赴東都序

叔通之文學政事若雄鉉百鍊竅卻中節比年由東曹郎  
給事黃門俄以中執法守上洛得幹支郡視方任焉及今  
亞尹洛師實顓府政冬十月至自繞雷來朝京師三接面  
命出車就道凡所以慈惠東人者得悉數焉以叔通之華  
資茂實而須長師於後命者蓋使洛邑耆老周知功化然  
後尺一詔條焜耀恩禮夫如是則吳公之理平第一不復  
專美於前書矣又豈以翺翔疾徐爲叔通道耶岐燕元老



理具惜別文昌六職夏官卿趙公而下舉白出祖交歡道  
舊鄙人病不能醉亦笑言擊節於其閒眾君子皆賦愧序  
引之辱

送許校書赴江西使府序

紳冕之士角逐於聲名者必以射策東堂校文石渠爲稱  
首於公範言之皆其細者予與公範尋世好以約交道獲  
申十年之敬出處多故及茲再會久飽諸公之議今日得  
之心包大猷口析精理可以稽合同異懸照是非夫然者  
焯當世之譽交大府之辟疾若機響不亦宜乎國家尚用

兵車之會且思磐石之固俾賢王秉旄節主江西諸侯辟  
書四下大搜雋望公範拂拭縫掖從容長裾赴知己之命  
伸丈夫之志固當酌六經精義以贊軍政俾介冑之下禮  
讓興行且以中庸明誠之根本覃思於文藻致用於政事  
發矟投刃固在於遠者大者庸詎知今茲一舉非圖南之  
羊角耶臨歧話別迭以勉固志業而已若愀然涕下以聚  
散爲念此可畧也眾君子置之

月夜泛舟重送許校書聯句序

公範持江西辟書駕言卽路其出處之跡與婉婉之畫鄙

人不腆已爲之序引且吳抵鍾陵二千里而遙凡我諸生  
愴離讌之不足故再徵斯會秋月若晝方舟泝沿笑言不  
謹引滿造適公範乃握管作三字麗句僕與二三子聯而  
繼之申之以四五六七以廣其事如其風煙月露與行者  
居者之思各見於詞

送張校書歸湖南序

予初與知柔交相見之禮而退雖未知其歸而意其賢逮  
今七年方再會於鍾陵交歡歡甚言理理詣其容溫然而  
不飾邊幅其中曠然而不施局鐫渴善好義困而彌彰締

交親仁久而益敬其於官名虧成之際則得之自是不得  
自是故年過四十方一命典校諸生以爲屈甚而張恬然  
儒冠峩峩不恥敝緼吟詠古道以文自娛獻歲南征者以  
寓環堵於長沙故也亦將參質文於屈宋詳歲時於荆楚  
楓樹千里片帆鳥飛晨征夜泊無非詩興彼湘君帝子之  
遺跡江蘼杜蘅之春色皆落君轂中矣而修軼者得無詞  
乎

送陸校書赴祕省序

陸氏爲江南冠族子容一門將以文藻行實振起風緒叔

父羣從歲爲儀曹首科子容亦再登甲乙讎校祕書繇是  
君子謂春官天官之舉不失人子容之名不過實歲七月  
將沂江流如京師塗出練湖實訪予言別予業以貧病不  
能自振方具臺笠鉏耒耕鑿吳門子容以名聲文采宦遊  
上國吳秦之遠道出處之殊致在此別也情如之何子容  
諸父深源方源我族之出有早歲遊處之舊故得君之道  
因是而深別離愀愴亦用加等於序引也所不敢辭

送薛十九丈授將作主簿分司東都序

丈人罷碭山尉之歲德興年旣亂寓居南徐拜手之初就

傳未足以遜志歌詩未足以類事嬉於硯席不知包羞會  
離之際亦命之賦爾來向三十年矣因緣進越濫吹於朝  
而丈人以河陰丞滿歲參調亦旣感泣悲歡相乘微辨風  
采乍疑夢想而又徵楊惲史氏之學發羊曇西州之歎家  
風代德有所未知遺文逸簡甫獲傳授以丈人素履厚行  
含章立誠黃琮白珩粲然內照可以書惇史激薄俗者有  
焉方安舒以潔已恥孟晉以枉道俛首受署不競於時方  
今王在在鎬東人望幸百執事之府署盡備擇才以理繕  
工之屬分領厥司所趨者靜其祿不薄且以嵩峯之下素

業在焉與夫角逐於京劇者異日論也離觴舉白征蓋就  
塗因以弱歲非詞發篋見示且曰今日之別其可默耶直  
書下情拜命之辱

欽定全唐文卷四百九十二目錄

權德輿十

送許協律判官赴西川序

送嶺南韋評事赴使序

送李十弟侍御赴嶺南序

送李十二弟侍御赴成都序

送李十兄判官赴黔中序

送襄陽盧判官赴本使序

送商州崔判官序



送右龍武鄭錄事東遊序

送台州崔錄事二十一丈赴官序

招隱寺上方送馬典設歸上都序

送睦州李司功赴任序

送當塗馬少府赴官序

送義興袁少府赴官序

送從舅泳入京序

送三從弟長孺擢第後歸徐州覲省序

送再從弟少清赴潤州參軍序

送從兄穎遊江西序

送從兄立赴崑山主簿序

奉送從叔赴任鄱陽序

送三從弟况赴義興尉序

送張評事赴襄陽覲省序

送前丹陽丁少府歸餘杭覲省序

送王仲舒侍從赴衢州覲叔父序

送元上人歸天竺寺序

送道依闍黎歸婺州序

欽定全唐文卷四百九十二

權德輿十

送許協律判官赴西川序

十年冬予與今左曹相君兵部郎崔君同受詔禁中雜閱對策以第其等將命於廷有請程百職之功緒者且以郎吏諫曹爲言時相君爲吏部郎崔爲右補闕因相顧曰直言者方譏切吾黨其可捨諸子撫手賀之以爲得雋及後詔下徵他日之詞則許生也典校滿歲西遊岷峨丞相彭城公雅聞其才辟以從事十三年冬以府檄計事至於京

師獻歲迴車醺酒祖道以子之直而和敏而文策名於天府叶志於元臣搏迅颺翔層雲將賀不暇給而別何爲愴眾君子中飲皆賦使鄙夫類之

送嶺南韋評事赴使序

大夫杜公用德禮威信訓齊南海居二年以部從事檄召京兆韋君君溫文裕蠱銳於術學在綺襦青衿之歲粲若冰玉年方冠仕至廷尉評擁大府之傳赴賢主人之命其徒榮之且梗枿巨榦不產培塿則知天鍾美茂亦多在世德其要在聿修之不息而已彼吏理與將命事之細者况

新發於硎鋌刃韜匣不折不缺之誠豈足爲執事道耶子  
嘗被公辟書辱在下介顧以多病不敢遠遊南方祈執事  
者芳訊見及則詳言美化佇爲中和樂職之頌以抒下情  
送李十弟侍御赴嶺南序

士君子之發令名沽善價鮮不由四征從事進者翔集翰  
飛蓋視其府之輕重耳則侍御之今日猶鄙夫之昔時也  
因想昔與今徐方連帥王僕射德素鉞府主公楊尚書達  
夫同登龍門於鍾陵爾來二十年矣二賢以大僚碩望當  
明天子注意分閫之重鄙夫顧無所用亦五叨中臺俯仰

印紱以過量自愧追懷舊恩敢忘其所自耶況侍御溫良  
敏肅用文術自贊初爲州里所舉俄屬聖朝以舊勲推恩  
累更祿位再至京劇今茲簪法冠駕軺軒感於已知不計  
勤遠又焉知圖南水擊之變化不在此耶旣賀侍御所從  
又悅達夫之舉賓主之間仁義在焉歟門告別思以言爲  
貺至若洪範之攸好德盤銘之日日新皆侍御所執也又  
何言焉敬謝達夫慎夏自愛無金玉爾音而已

送李十二弟侍御赴成都序

相國臨淮公觀風俗於井絡之下辟禮所及皆雋人賢士

隴西李侯虛中敏厚而文嘗再中正鵠於春官天官氏同  
門生已翰飛三臺出入承明獨用恬退結黃綬於伊洛或  
靜以勝熱或羸而不囂予意其必遇真工大冶以發銚刃  
今果義惠文趨黃閣視其所舉問其所從可以交賀矣行  
當見相君政成一方執介圭歸上台則掖垣侍從之選不  
在從事之賢者吾不信也中外零落始衰多疾祖道握手  
漣然涕洟至若銅梁玉壘之勝踐使軒賓榻之盛集皆備  
於歌詩者之說不能悉數云

送李十兄判官赴黔中序

今名卿賢大夫繇參佐而升者十七八蓋刷羽幕廷而翰  
飛天朝異日之濟否視所從之輕重故予內兄以黔巫之  
地爲夷途安流者受署於中執法王君故也以王君之馨  
香望實宜處清近久矣惟天愛人授茲一方則兄之赴知  
已誠可賀也兄端明文敏焯見吏理奉本府之書奏陳遠  
人之便宜已事復命驅車就路敢用觴酒宴輶繫之以言  
曰武陵辰溪四封十五郡大凡五十餘城以仁佐賢寧彼  
縣道婉婉語言化爲風謠然後徵理行之第一獻賓寮之  
功用夫如是得不謂所從之重乎京師離羣咏嘆仁政寓



辭鈴閣之下無金玉其音

送襄陽盧判官赴本使序

德蕩乎名名與實軌矣至有趨世徇物隨波同流茫茫九  
有公是大喪故道直多棄行方則躓鄙嘗病之今見盧君  
君精辨自內直方形外隤然獨立以名教自任每著文輒  
先理要而後文采至若罪荀文若評郭林宗發明指擿意  
出舊史其旨在乎澄汰風俗埽鎮浮誕舉而行之有補王  
度衡茅居息終歲自樂貞恒之心風雨不改與夫叩角彈  
鋏不相遠乎中丞李公以清德重望秉旄漢南辟士之日

以君爲首非夫知精達識又焉能出眾人之視聽延拔貞  
晦則漢南風政因茲而見驛騎蕭蕭訪別蓬門元言清酤  
相會於遠君又授予以正名至終二論鄙人亦出篋中幾  
銘名實論士行辨三篇以申報貺

送商州崔判官序

商於之地與郊圻接畛藩部條職顓達於京師且有賦輿  
得署賓介今二千石以宗室貞幹自中臺郎出守首辟博  
陵崔君君溫恪廉清且以文敏緣飾三命官至汜水主簿  
吏理有聞以中外之勲華文雅所憑者厚遊必有方翔而

後集然則君之委質商之報政二者其相爲用乎園綺風聲夢想如在古祠喬木爲寄遐心

送右龍武鄭錄事東遊序

予弱歲時從師於黨塾鄭生已用經術上第誦古先格言圓冠紳帶綽綽溫雅里閭僑居年輩爲長迨今踰二紀三徙官至親軍紀綱掾青袍化緇班鬢如艾徐道舊故悲歡相因以鄭生之理文修行而職業未稱得不爲大來之將然歟抑食浮於人者或腊毒歟予不知也今則請急於環列導途於江介懷舊遊也吳中多賢士君子居易求志爲

予多謝之

送台州崔錄事二十一丈赴官序

夏四月臨海紀綱掾崔稚璋受命選部出車東門是歲重  
表甥權德輿始至京師寓居同里顧其室空無以自貺遠  
輒竊仁者之義申之以言云古之君子修誠以慎獨居易  
以養正行實中茂而纓轂外華其或不至則安之若命蓋  
直已而不必用蹈道而不必行居今行古者實鮮而稚璋  
是已言必踐學必思四命官率由會府進不苟而交不黷  
簡廉肅給推心爲理滿歲罷去則與令弟躬耕於茅山之

下睦姻食力修家法考農政嘻嘻申申有義有仁起於棖  
闡被於鄉黨之動也之靜也得古之遺風聞然而未彰不  
易其方寧蹇連以終否無奇衰以害正華髮承弁知者嘆  
之且夫列郡之督郵視天臺之司轄地征之眾寡賦政之  
細大爲樞爲柅何莫由斯子獨知臨海之人受賜不暇矣  
又况琪樹風清石橋月明羽人僊子髣髴如覲遣有涉無  
與境而勝象外之歡可勝旣乎今大君子主制河東諸侯  
府多雋賢且有雅知稚璋者庸詎知今日適越不爲異時  
之大來耶二三君子送遠加等醢酒以祖道歌詩以發志

賢稚璋而思仙山故也各見於詞

招隱寺上方送馬典設歸上都序

扶風馬諫茂直直方中和之性發於恬曠放言遣詞亦有  
餘力知名舊矣故相得甚歡觀覽其卷則警會心府三復  
不倦若霜鴻清唳松雪孤映或諸生所不能至者而茂直  
至之且多特操尤病苟進故調於南宮仕於東朝戰勝無  
悶官閑更適適相遇於南徐俄愴離居官局所係言旋上  
國予乃與一二疎放之客詣精廬上方主人又以啜茗藉  
芳代夫飛觴舉白元言至論代夫握手流涕時物具舉靈

臺曠然晴江有楓千里在目茂直深於詩者眾君子以詩  
貺之

送睦州李司功赴任序

郡功曹實亞都吏而冠六聯選部銓署勤於他職李侯宗  
室子器幹明茂莅官處煩率無留事清修緣飾傾心於士  
友此其可尚也予接李侯中外之姻十二年矣曩歲旣展  
禮屬予有禮官之命來趨闕下今茲得調甫獲再會又屬  
予承乏代斲於儀曹不得授館以觴酒相歡纔數四耳征  
蓋將去離憂惄然竊聞太夫人賢明有闔門訓誡予之內

妹主中饋勸以義出則事良二千石分曹賦事入則順承  
慈歡琴瑟靜好名教之樂豈待多祿耶富春江漁浦潭紀  
行之詩與郡中坐嘯主諾之謠吾知之矣族屬稽滯於江  
南者眾寓書難徧悉爲多謝

送當塗馬少府赴官序

予始與馬生相遇於南徐州皆以刊校冗員涵泳文誼生  
以旣不得調廼反初服與計偕予放浪於江湖閒因爲東  
諸侯辟召旋忝朝命與漢廷臣並行於西垣南宮中時生  
窮閭旅食射策未中積歲於靈臺之下儒衣甚敝詩思不



訕亦與其徒三數生嬉春感秋觴酌吟嘯視豪游曠貴者  
敖如也先皇帝不以僕不肖使操刈楚之柄輒以得士自  
賀豈惟竊不遺不偷之目而已耶今之出青門結黃綬筮  
仕賦祿於東南之奧區且曰外兄州尊理行充茂所以利  
攸往而不薄於中都官誠有由也然則郡齋言詩幕廷主  
畫雖欲勇退其可逃乎清和之月草木條暢京邑氣正在  
陽則舒方宜會合坐歎離索追計舊故向三十年湖塘里  
巷疑在前日各有班鬢愴茲離襟又何可言也爲子敬謝  
中丞君乃者南康永嘉廬江晉陵已爲二千石表率今當

金匱全書卷之三  
明天子守臣之寄爲仁由已固又與前四郡不侔賦政之暇知君自熟豈敢爲曹邱耶但交賀而已

送義興袁少府赴官序

過江山水陽羨居最性質夷淡者得之愈深袁生愿恭文敏渴善好學今茲試吏其本可書先正南陽王實扶中興之運光啟土宇慶流後昆國有令典延世命官解巾筮仕偶得佳境况青春之年綵衣黃綬出則爲政入則承歡以世德遺直而慎修之不息異時必復此其椎輪歟追思童丱游寓茲地煙潭雲洞杳窅靜深邑中諸生多業文者亦

今年羣從之調試於天官春官者以十數興廉舉秀既有  
其人而少清以經明解巾參南徐州軍事其伯氏掾周衛  
叔氏簿邾城代耕話別徵詩導志夫千里足下九江濫觴  
致遠就深在乎不已况爾文敏修潔澡身立誠康莊渤澥  
吾見其往至如鮑昭之詞律孟嘉之風流又其次也想自  
卅歲僑居是邦趨朝七年束一作榮以紳珮煙霞井田如在  
目前舉白祭輶離憂加等尚書公以政成事簡鎮安一方  
幕庭婉婉多我之執爾其敬恭以事長者求爲可知闔然  
日彰嚮吾所謂不已之道在此而已十三年三月醉後序

送從兄穎遊江西序

昔安邱敬公以王佐之才而運丁苻氏故經綸大畧堙阨不振如其乘時行道可以財成家邦豈止於相區區前秦與王景畧齊名而已時軌道塞從古以然德輿與兄實承安邱之遺烈其後枝流以食舊德故兄能踐中行蹈貞厲守師氏之訓修君子之詞慤靜而用晦誠謙以居約者向二十年衰衣大帶名未登於王府方以一葦爲航遊江湖閒今將省家於上饒順流於潯陽羈旅之中未始以進趣爲念鄙則不敏粗爲哲兄言之自十數年閒戎車居天下

之半故純白清靜之士多鬱而不發其或倚佳名席勢

一作

世卿以取富貴者皆朝爲屠沽夕拖章組風波變化以萬萬計其次或雜與諸生之徒冠柱後惠文持從事使者之檄溢於府寺誼於傳置風流不還聲實相遠然則得喪本不足以滑曠士之慮又況今之得喪耶先師曰知足者不以羨自累行修於內者無位而不忤此二者可以書紳而三復也鄙夫所獻者如斯已矣如其地理所厯與煙霜之候皆備於詩人之思此畧而不書

送從兄立赴崑山主簿序

士君子筮仕之門有以代德庥蔭而奉清廟齋祠者及夫  
試吏就祿與秀才孝廉郎等蓋以舊服流慶後昆宜之其  
於弊人爲善之義深矣從兄承舄奕簪纓之後荷葳蕤文  
誼之訓敏於學行而薄於宦名乃今調於天官署崑山主  
簿以姑胥之通邑士衡之佳句僑舊耕種多依是閒上有  
良二千石爲東諸侯表率其飭躬敬事夙夜勤敏椎輪積  
水或在茲乎從弟中書舍人德興序其所繇俾羣從偕賦  
奉送從叔赴任鄮陽序

叔父端懿誠厚退然自牧博洽前載不以沽名待價爲心

德輿羈州時伏見從叔義興君戶部君送別二序自前秦  
安邱敬公至周千金恭公而下德善功烈辨其昭穆叔父  
承千金廣川清水三葉紹封之慶其素履淑行二叔父實  
詳言之爾來三十餘歲矣服義日茂用晦如初以仁愛任  
恤復趨選部銅章列城得之不勤昔季路宓不齊理蒲與  
單父爲孔門上第宏之在人仁遠乎哉况番君故地理通  
下邑其壤沃其境清惠和簡廉可以游刃異日九江之西  
上百里課第於有司者其在叔父乎佐酒霑醉歌詩爲禮  
有命曰爾宜序謹序

送三從弟況赴義興尉序

漢廷諸公皆附經術而施政事故其有猷有爲不疚不懼  
若況者嘗理左右史記事記言之經傳纂訓居有司籍奏  
中乃令參調署吏以養以仕言顧於行行本於經修性勤  
身而祿在其中矣夫學者病口肆其言而心不能通故吾  
三年第經明者三百餘士而知類通達者往往有焉嘗與  
賢諸侯河東柳敬叔吳郡陸伯冲寓書往復論取士之道  
二君子言之頗詳若況之所履其吾與二君子之所欲求  
也豈無多文之富耶而況不耀豈無趣捷之敏耶而況不



爲蓋質素者受采必固平夷者遵道必遠況之志其在是  
乎吾與況也行以五綵衣裳視朝夕膳裘褐初解綬黃甚  
新彼陽羨有佳山水玉潭東舍溪南岳洞靈仁祠僊觀邑  
子鄉導窮年勝賞筮仕於斯其樂如何有以賀義方之慶  
輕少別之戚伯仲羣從類其詩文亦命小子璩繫於編末  
時皇帝御極甲子赦令之後一月也

送張評事赴襄陽覲省序

廷尉評張君以溫文敏直爲修身策名之具其於剡挹風  
雅導詠情性成乎餘力粲爲清詞故嘗擁盛府之傳誼士

林之譽自中發外豈徒然哉春三月自鍾陵抵漢南綵衣  
班然脂轄首路將欲問詩禮於堂下謁旌旆於轅門漢南  
之渴賢下士張侯之清聲茂實翔集之美其可逃乎僕以  
不腆辱鍾陵從事之末君卽我公之南容也故得揖光塵  
於門閣接笑言於杯斝交歡而莊敬旣醉而溫克樂未幾  
也別又繼之羣賢以地經舊楚有離騷遺風凡今讌輶歌  
詩惟楚詞是數以官命輕重爲編次前後云

送前丹陽丁少府歸餘杭覲省序

丁氏子用文誼緣飾吏道尉丹陽三年嘉聞籍甚罷去之

日以綵衣歸田廬邑中諸生愴離譙之不足俾予序羣言  
以爲貺且著作繇經術進徧覽東觀石渠之奧殆二十年  
然後以華髮赤紱歸休里第巾安車理農政視纓轂聲榮  
與冀壤同矧餘杭有山水仁祠爲浙右之冠想夫人持琴  
書履杖視朝夕之膳咨諏古義發明隱伏煙蘿魚鳥在動  
靜閒夫如是焉用以少別爲念

送王仲舒侍從赴衢州覲叔父序

士有抗方外之迹以世教爲桎梏者不然則必由於文章  
之途以其合大中之道天理發於心術周於事業此賢士

君子之所以致思也太原王生仲舒從事於斯弱冠秀發始以雅詞一軸爲士相見之贄子嘗學於此閒世多病方將自全於朴止所不知及覽子之文文達而理舉溫潤博雅且多古風則曩時之心斐然復生所守不固然也然則文變損益非鄙所知粗言士友出處之畧用以爲贈動而不皦靜而不昧簡而不峻通而不雜此吾徒之所夙夜也固在子之轂中耳行旅之虞不足以誠執事自由拳抵信安途不千里奉板輿之歡赴竹林之期況新安江路水石清淺嚴陵故臺德風藹然漁浦潭七里瀨皆此路也二謝

清興多自茲始今日出祖可以言詩

送元上人歸天竺寺序

度門之教根於空寂因修以取證階有以及無不踐精深之習而悟虛無之理者未之有也未得爲得則其病歟僕久味斯法思與言者旣而得元禪師師早誦大乘經各數萬言晚得觀門之學今則色空如一哀樂不入矣桑門之患有二焉未得之患爲外見所雜旣得之患爲內見所縛今元公脩然於二見之間不內不外冥夫至妙身戒心惠合於無倪且以句吳有山水之絕境天竺又經行之靜界

振錫而往其心浩然蓋隨緣生興觸物成化而不爲外塵所引也幅巾男子權德輿稽首

送道依闍黎歸婺州序

予與惠公游十年而惠公以其徒依公見訪藹然之和發於眉宇得其道者不待言說予嘗欲黜健美遺名聲不使塵機世相滑湣靈府故每隨縉紳士則神怠與依惠游則性勝蓋循分而動亦境所由然上人以東陽爲山水佳地且生約二德昔所游踐况雲洩石室花發桃巖是二精舍爲東南甲乙乃振緇錫泛然而行道機法樂盡在是矣如

僕者方牽攀世教未得與師爲方外之遊遐情幽賞期一  
二偈疏